

Relaciona cu e reaccion riba articulo "Prostitucion di Pais Aruba"

Contesta na Drs. H.D. Croes

ORANJESTAD (AAN) Manera tabata di spera cu algun hende, pa sea motibonan di convivencia politico of personal y te hasta kizas racista, lo bay saca e articulo 'Prostitucion di pais Aruba' completamente for di su contexto, asina mes a tuma lugar cu e reaccion di entre otro Drs H.D. Croes.

Pa refresca memoria y aclarea e articulo 'Prostitucion di pais Aruba' y specialmente pa esnan kende a lesa, pero deliberadamente no kier a compronde e contenido di e articulo y mas importante ainda, no kier a compronde e mensahe publico di e articulo; ningun caminda tabata tin poni cu mester saca hende di Aruba!

Ningun caminda tin poni cu mester saca di Aruba cualkier persona di cualkier nacionalidad of di origen extranhero y meta di e articulo no tabata basa riba esey tampoco.

E meta principal di e articulo ta pa ilustra kico ta pasando na Aruba pa ultimo añanan y sigur ultimo lunanan unda politica partidista y tambe e politica di hamber pa keda na poder cueste loke cueste, ta pone cu inmigracion masal di extranheronan pa Aruba tardi of tempran lo bay crea problemanan grandi den e sentido amplio di e palabra.

Riba su mes e informacion ey no tabata nada nobo pasobra tur hende cu dos placa di sinti por mira y ripara e consecuencianan di entrada exagera di extranheronan na Aruba, pero te cu recien mayoria hende tabata sconde pa e berdad y tabata tin miedo pa publicamente ranca na e bel di emergencia y bisa cu algo mester wordo haci.

Te hasta extranheronan cu tin sea decadanan largo caba biba na Aruba, como tambe esnan cu tin un paar di aña biba na Aruba, ta bisa cu si algo no wordo haci pa para e inmigracion masal cu tin andando y specialmente awor cu extranheronan ta wordo mal uza pa cierto partido y politiconan logra haya voto, e problema di inmigracion lo bay escala cu consecuencianan negativo pa tur hende biba na Aruba.

Tur cu ayera (te con leu ta conoci) ningun hende a mira un reaccion publico riba e topico aki di parti di Drs. H.D. Croes y si e articulo yama 'Prostitucion di pais Aruba' no a sali publica, publico lo a mira un articulo den corant di Drs. H.D. Croes?

Ta facil pa sinta zundra y hunga balente na cas y cerca bisiñanan y den bo mesun circulo di famia y amistadnan, pero otro ta pa sali publicamente pa dilanti y expresa bo (e palabra 'Bo' en general) mes como ciudadano di pais Aruba y alerta pueblo y tambe sali na vanguardia di loke bo ta kere y sinti ta di bo y cu esaki mester wordo proteha pasobra bo ta wak cu cos ta

bayendo for di man.

Drs. H.D. Croes a trece un reaccion pa dilanti cu no tin nada di haci cu contenido di e articulo pasobra el a bay den historia te den tempo di Indian pa ilustra abusanon cu tabata wordo haci e temponan ey caba contra e loke e mes ta ilustra como e Arubianonan di pura sepa.

Shon Drs. Croes; nos no ta biba mas den tempo di Indian y e discusion y e polemica tras di e asunto di e Arubiano di pura sepa ta tempo perdi pa bay sinta discuti riba dje pasobra manera abo mes ta ilustra, e pueblo aki ta mezcla cu tur sorto di hende di diferente origen, pero den bo reaccion ta bon bisto si cu bo tin un tendencia (pasobra ta e impresion ey bo a crea) di cuestiona origen y nacionalidad di cierto hendenan of gruponan biba pa siglonan caba na Aruba. Na un forma tendencioso bo ta referi na hendenan di Hulanda, Surnam, Curacao, Boneiro, Grenada, Islanan Ariba etc cu 'mester a wordo tolera' na Aruba pasobra manera abo mes ta bisa, 'mannan di e Arubianonan tabata mara'!

Manera cu esaki no tabata suficiente, bo ta cuestiona tambe indirectamente tur Colombiano y tambe Hudiunan y Arabiennan kendenan nunca lo a asimila cu nativonan humilde y riba dje ta pretende di ta domina nos idioma mihor cu nos!

Aki ta bon bisto cu ta na entre otro Jossy Mansur bo ta referi na un forma indirecto ora cu bo kier ilustra e cuenta cu e Arabier (pasobra e ta di decendencia Libanes) ta haci como si fuera e ta domina nos idioma mihor cu nos; esey no ta un ponencia racial? Pakico bo no tin e curashi pa menciona nomber directamente?

Pasobra segun e documento cu bo ta referi na dje, cu e Indiannan tabata pone un cruz banda di nan nomber pasobra nan no tabata por a skirbi y mayoria di nan tabata carga e fam Croes y tambe Geerman y Werleman y abo tambe ta carga e fam Croes, esey kieren cu abo si ta e Arubiano di pura sepa?

Ta un discusion sin fin bo kier lanta cu tipo di ponencianan asina pa mayan pueblo di Aruba

bay den conflicto interno cu otro kende si y kende no tin e derecho di yama su Arubiano?

Finalmente den bo reaccion bo ta menciona cu mester vigila pa nan no pone nos den reservaat banda di Arikok; shon nos ta den reservaat chiquito caba cual ta nos casnan pasobra pafor di nos casnan, ta politiconan di mala fe ta manda y ta entregando tur loke ta di nos pa nan keda of yega na mando pa nan sigui privilegia nan mes y un grupito.

Ps. Mi wela y welo 'di Aruba' ta di fam Geerman y Winterdaal mientras esnan di exterior; Hart, Flores etc ta procedente di Curacao, Boneiro, Hulanda, COLOMBIA y te hasta di Libanon!

Mi ta considera y mas importante ainda, mi ta sinti mi mes Arubiano.

San rancune
Redactor Vale Hart

TELEFONAN DI DIARIO
582-6747- FAX 582-8551


EY DEN MI KIER TA!!



BEST DEAL
PARADERA

BEST SHOPPING DEAL
TURIBANA PLAZA

LAS AMERICAS
PARIBA DI BURGER KING
(Caya Grandi)



Super Special Prijs!

Maletin pa School
Antes: 45,=
Awor: 25,= so!!!